

慧日佛學班第 12 期／福嚴推廣教育班第 23 期

《大智度論》卷 82

〈釋大方便品第六十九¹〉²
(大正 25, 632b14-639b30)

釋厚觀 (2012.05.19)

【經】³

壹、讚歎菩薩成就方便力

(壹) 明往昔因行

一、發心已歷無量劫數

爾時，須菩提白佛言⁴：「世尊！是菩薩摩訶薩如是方便力成就者，發意已來幾時？」

佛告須菩提：「是菩薩摩訶薩能成就方便力者，發心已來無量億阿僧祇劫。」

二、已供養如恆河沙等諸佛

須菩提言：「世尊！是菩薩摩訶薩如是成就方便力者，為供養幾佛？」

佛言：「是菩薩成就方便力者，供養如恆河沙等諸佛。」

三、具足六度諸善根

須菩提白佛言：「世尊！菩薩得如是方便力者，種何等善根？」

佛言：「菩薩成就如是方便力者，從初發意已來，於檀波羅蜜無不具足，於尸羅波羅蜜、羼提波羅蜜、毘梨耶波羅蜜、禪波羅蜜、般若波羅蜜無不具足。」⁵

¹ 「大智度論釋大方便品第六十九卷八十二」十七字 = (大智度論卷八十二釋方便品第六十九品上) 十八字【宋】， = (大智度論卷八十二釋方便品第六十九品上) 十九字【宮】， = (大智度論卷八十二釋方便品第六十九上) 十七字【元】， = (大智度論卷八十二釋方便品第六十九之上〔經作大方便品〕) 二十四字【明】， = (大智度經論卷八十二釋第六十八品上) 十七字【聖】， = (摩訶般若波羅蜜品) 第六十八方便品卷八十二) 十九字【石】。(大正 25, 632d, n.10)

² 《大智度論疏》卷 24：「第六十八品者名為〈方便品〉，即是方便門中第三品也；所以次〈六度相攝品〉後明此品者，上明菩薩於一度中而能具足諸波羅蜜，今明所以然者，由菩薩善巧方便故，所以如此——故次〈六度相攝品〉，後明〈方便品〉。將欲釋故，舉之云第六十八品釋論也。」(卍新續藏 46, 916c16-20)

³ 〔【經】〕—【宋】【宮】。(大正 25, 632d, n.11)

⁴ 《大智度論疏》卷 24：

「爾時須菩提白佛言」已下，就此品中大有四分：

第一、就人辨方便，是故善吉問成就久近、供養佛多少、發心時節。菩薩即是方便之人，波若即是方便之法。

第二、從「譬如日月周行照四天下」，明波若、方便導成眾行。

第三、明脩因得果，名為因果方便。

第四、明菩薩善學波若，雙照二諦，名為照達方便。

有此四意。今此初即是第一也。當一一說。(卍新續藏 46, 916c21-917a3)

⁵ 《大般若波羅蜜多經》卷 460〈68 巧便品〉：

佛告善現：「是菩薩摩訶薩發心已來，無有布施、淨戒、安忍、精進、靜慮、般若波羅蜜多所引善根而不圓滿精勤修學，由此因緣，成就如是巧方便力。」(大正 7, 322b17-21)

（貳）歎人希有

須菩提（632c）白佛言：「世尊！菩薩摩訶薩成就如是方便力者，甚希有！」

佛言：「如是！如是！須菩提！菩薩摩訶薩成就如是方便力者，甚希有！」

貳、讚歎菩薩方便妙用

（壹）般若能導萬行至無上菩提

一、舉喻歎般若為萬行之首

（一）日月周行照天下喻

須菩提！譬如日月⁶周行⁷，照四天下，多有所益；般若波羅蜜亦如是，照五波羅蜜，多有所益。

（二）具輪寶乃名輪王喻

須菩提！譬如轉輪聖王，若無輪寶⁸，不得名為轉輪聖王；輪寶成就故，得名轉輪聖王。

須菩提⁹！五波羅蜜亦如是，若離般若波羅蜜，不得波羅蜜名字；不離般若波羅蜜故，得波羅蜜名字。

（三）有夫之婦難可侵喻

須菩提！譬如無夫婦人，易為侵凌¹⁰；五波羅蜜亦如是，遠離般若波羅蜜，魔、若魔天壞之則易。

譬如有夫婦人，難可侵凌；五波羅蜜亦如是，得般若波羅蜜，魔、若魔天不能沮壞¹¹。¹²

（四）軍將具足鎧仗喻

須菩提！譬如軍將，鎧仗¹³具足，隣國強敵所不能壞；五波羅蜜亦如是，不遠離般若波羅蜜，魔、若魔天、若增上慢人，乃至菩薩旃陀羅所不能壞。

⁶ 《大智度論疏》卷 24：

「譬如日月」已下，明譬如日月周行，陰陽周行，四域多有所益；波若、方便二法亦爾，其猶日月益眾行也。當說。（卍新續藏 46，917a4-6）

⁷ 周行：1.巡行，繞行。2.循環運行。（《漢語大詞典》（三），p.297）

⁸ 《大智度論疏》卷 24：

「若無輪寶」已下，《薩遮尼乾經》云：雖有六寶、千子具足，若無輪寶者，但名似轉輪王，唯王一天下也。合喻等義，當說。（卍新續藏 46，917a6-8）

⁹ 〔須菩提〕—【宋】【元】【明】【宮】【聖】。（大正 25，632d，n.12）

¹⁰ （1）凌=淩【宋】【宮】，=陵【元】【明】【聖】。（大正 25，632d，n.13）

（2）侵凌：侵犯欺凌。（《漢語大詞典》（一），p.1427）

¹¹ 沮壞（ㄐㄩˇ ㄏㄨㄞˋ）：毀壞，敗壞，破壞。（《漢語大詞典》（五），p.1072）

¹² 《大般若波羅蜜多經》卷 460〈68 巧便品〉：

善現當知！如有女人端嚴巨富，若無強夫所守護者，易為惡人之所凌辱；若有強夫所守護者，不為惡人之所凌辱。布施等五波羅蜜多亦復如是，若無般若波羅蜜多力所攝護，易為天魔及彼眷屬之所沮壞；若有般若波羅蜜多力所攝護，一切天魔及彼眷屬不能沮壞。（大正 7，322c4-10）

¹³ （1）鎧仗：鎧甲和兵器。（《漢語大詞典》（十一），p.1370）

（2）鎧（ㄎㄞˇ ㄩˇ）：古代作戰時護身的服裝，金屬製成；皮甲亦可稱鎧。（《漢語大詞典》（十一），p.1370）

（3）仗：1.弓、矛、劍、戟等兵器的總稱。（《漢語大詞典》（一），p.1129）

(五) 小王朝宗輪王喻

須菩提！譬如諸小國王，隨時朝侍¹⁴轉輪聖王；五波羅蜜亦如是，隨順般若波羅蜜。

(六) 萬流入大海喻

譬如眾川萬流，皆入於恒河，隨入大海；五波羅蜜亦如是，般若波羅蜜所守護故，隨到薩婆若。

(七) 右手作事方便喻

譬如人之右手，所作事便，般若波羅蜜亦如是；如人左手，造事不便，五波羅蜜亦如是。¹⁵

(八) 眾流入海合一味喻

譬如眾流，若大、若小，俱入大海，合為一味；五波羅蜜亦如是，為般若波羅蜜所護，隨般若波羅蜜入薩婆若，得波羅蜜名字。¹⁶

(九) 輪寶前導皆隨王意喻

譬如轉輪聖王四種兵，輪寶在前（633a）導，王意欲住，輪則為住，令四種兵滿其所願，輪亦不離其處；般若波羅蜜亦如是，導五波羅蜜到薩婆若，常是中住，不過其處。¹⁷

譬如轉輪聖王四種兵，輪¹⁸寶在前導；般若波羅蜜亦如是，導五波羅蜜到薩婆若中住。般若波羅蜜亦不分別：『檀波羅蜜隨從我，尸羅波羅蜜、羼提波羅蜜、毘梨耶波羅蜜、禪波羅蜜不隨從我。』

檀波羅蜜亦不分別：『我隨從般若波羅蜜，尸羅波羅蜜、羼提波羅蜜、毘梨耶波羅蜜、禪波羅蜜不隨從。』

尸羅波羅蜜、羼提波羅蜜、毘梨耶波羅蜜、禪波羅蜜，亦如是。

何以故？諸波羅蜜性無所能作、自性空、虛誑、如野馬。」¹⁹

二、歎般若勝妙，能攝導萬行**(一) 正明般若能攝導萬行**

¹⁴ (1) 朝侍=侍朝【聖】，=朝【石】。(大正 25, 632d, n.15)

(2) 朝(彳幺ノ)侍：猶朝見。(《漢語大詞典》(六), p.1317)

¹⁵ 《大般若波羅蜜多經》卷 460〈68 巧便品〉：

善現當知！如人右手能作眾事，如是般若波羅蜜多能引一切殊勝善法。

善現當知！如人左手所作不便，如是前五波羅蜜多不能引生諸勝善法。(大正 7, 322c22-25)

¹⁶ 《大般若波羅蜜多經》卷 460〈68 巧便品〉：「善現當知！譬如眾流，隨其大小，若入大海，同得鹹名。如是前五波羅蜜多要入般若波羅蜜多，乃得名為能到彼岸。」(大正 7, 322c25-28)

¹⁷ 《大般若波羅蜜多經》卷 460〈68 巧便品〉：「善現當知！如轉輪王欲有所趣，四軍導從，輪寶居先；王及四軍念欲飲食，輪即為住；既飲食已，王念欲行，輪即前去。其輪去住，隨王意欲，至所趣方，不復前去。如是前五波羅蜜多與諸善法，欲趣無上正等菩提，要因般若波羅蜜多以為前導，進止俱隨，不相捨離，若至無上正等菩提，更不前進。」(大正 7, 322c28-323a6)

¹⁸ 輪=三【聖】【石】。(大正 25, 632d, n.17)

¹⁹ 《大般若波羅蜜多經》卷 460〈68 巧便品〉：「所以者何？如是六種波羅蜜多及一切法自性皆鈍，無所能為、無有主宰、虛妄不實、空無所有、不自在相，譬如陽焰、光影、水月、幻事、夢等，其中都無分別作用真實自體。」(大正 7, 323a13-17)

1、諸法雖畢竟空，菩薩當以方便力為眾生行六度

(1) 總明以方便力為眾生行六度

爾時，須菩提白佛言：「世尊！若一切法自性空，云何菩薩摩訶薩行六波羅蜜當得阿耨多羅三藐三菩提？」²⁰

「須菩提！菩薩摩訶薩行六波羅蜜時，作是念：『是世間心皆顛倒，我若不行方便力，不能度脫眾生生死。我當為眾生故行檀波羅蜜、尸羅波羅蜜、羼提波羅蜜、毘梨耶波羅蜜、禪波羅蜜、般若波羅蜜。』

(2) 別明為眾生行六度

A、施度

是菩薩為眾生故，捨內外物；捨時作是念：『我無所捨。何以故？是物必當壞敗。』菩薩作如是思惟，能具足檀波羅蜜。

B、戒度

為眾生故，終不破戒。何以故？菩薩作是念：『我為眾生故發阿耨多羅三藐三菩提，若殺生是所不應；乃至我為眾生故²¹發阿耨多羅三藐三菩提，若作邪見、若貪著聲聞辟支佛地，是所不應！』菩薩摩訶薩如是思惟，能具足尸羅波羅蜜。

C、忍度

菩薩為眾生故不瞋心，乃至不生一念。²²菩薩如是思惟：『我應利益眾生，云何而起瞋心？』菩薩如是思惟，能具足羼提波羅蜜。

D、精進度

菩薩為眾生故，乃至阿耨多羅三藐三菩提，常不生懈怠心。菩薩如是行，能具足毘梨耶波羅蜜。

E、禪定度

菩薩為眾生故，乃至得阿耨多羅三(633b)藐三菩提，不生散亂心。菩薩如是行，能具足禪波羅蜜。

F、般若度

菩薩為眾生故，乃至得²³阿耨多羅三藐三菩提，終不離智慧。何以故？除智慧，不可以餘法度脫眾生²⁴故。菩薩如是行，能具足般若波羅蜜。」²⁵

²⁰ 《大智度論疏》卷 24：「第三、明因果方便。就因果門中亦有明生、法二空，善吉讚嘆，示道非道、勸學等義，並一一至文，當一一釋也。」（卍新續藏 46，917a9-12）

²¹ 〔故〕—【宋】【元】【明】【宮】【聖】。（大正 25，633d，n.3）

²² 《大般若波羅蜜多經》卷 460〈68 巧便品〉：「是菩薩摩訶薩為脫有情生死苦故，終不發起忿恚等心；假使恒遭毀謗、凌辱、辛楚、呵責，痛徹心髓，終不發起一念瞋恨；設復恒遭刀杖瓦石杖塊等物捶打其身、割截斫刺、分解支節，亦不發起一念惡心。」（大正 7，323b11-16）

²³ 〔得〕—【宋】【元】【明】【宮】。（大正 25，633d，n.7）

²⁴ 《大智度論疏》卷 24：

「除智慧不可以餘法度脫眾生」已下，如師子雷音佛國種種寶玩皆勝諸天，亦無行戒、施等福德事，但彼諸樹等皆能出實相音，令眾生得解，得無生法忍，至薩婆若。此國唯以智慧得佛，如諸天等雖有福德而不能至佛，唯智慧可有獨得佛之義，故云「除智慧」。若此間國土等，始須福、智二事得佛；如彼國者，唯智慧得佛道也。（卍新續藏 46，917a12-19）

2、諸波羅蜜中，般若為最上**(1) 釋「諸度無差別相，云何般若最勝妙」**

須菩提白佛言：「世尊！若諸波羅蜜無差別相，云何般若波羅蜜於五波羅蜜中第一、最上、微妙？」²⁶

佛告須菩提：「如是！如是！諸波羅蜜雖無差別，若無般若波羅蜜，五波羅蜜不得波羅蜜名字；因般若波羅蜜，五波羅蜜得波羅蜜名字。

須菩提！譬如種種色身²⁷，到須彌山王邊，皆同一色；五波羅蜜亦如是，因般若波羅蜜到薩婆若中，一種無異，不分別是檀波羅蜜、是尸羅波羅蜜、是羼提波羅蜜、是毘梨耶波羅蜜、是禪波羅蜜、是般若波羅蜜。何以故？是諸波羅蜜無自性故。以是因緣故，諸波羅蜜無差別。」

(2) 釋「隨實義無分別，云何般若最勝妙」

須菩提白佛言：「世尊！若隨實義無分別，云何般若波羅蜜於五波羅蜜中最上、微妙？」²⁸

佛言：「如是！如是！須菩提！雖實義中無有分別，但以世俗法故說檀波羅蜜、尸羅波羅蜜、羼提波羅蜜、毘梨耶波羅蜜、禪波羅蜜、般若波羅蜜。為欲度眾生生死，是眾生實不生不死、不起不退。須菩提！眾生無所有故，當知一切法無所有。以是因緣故，般若波羅蜜於五波羅蜜中最上、最妙。³⁰

須菩提！譬如閻浮提眾女人中，玉女寶³¹第一、最上、最妙；般若波羅蜜亦如是，

²⁵ 《大般若波羅蜜多經》卷 460〈68 巧便品〉：

是菩薩摩訶薩為脫有情生死苦故，不離般若波羅蜜多，乃至無上正等菩提，常勤修學世、出世間微妙勝慧。所以者何？是菩薩摩訶薩恒作是念：「若離般若波羅蜜多，於諸有情不能成熟，亦不能得一切智智。」是菩薩摩訶薩由此觀察，修行般若波羅蜜多疾得圓滿，速證無上正等菩提。善現！由此因緣，雖一切法無實相用，自性皆空，而諸菩薩摩訶薩眾，勤修六種波羅蜜多常無懈怠，求證無上正等菩提。（大正 7，323c4-13）

²⁶ 《大般若波羅蜜多經》卷 460〈68 巧便品〉：

爾時，具壽善現復白佛言：「世尊！若一切種波羅蜜多性無差別，皆是般若波羅蜜多所攝受故，皆由般若波羅蜜多修成滿故，應合為一波羅蜜多，所謂般若波羅蜜多，云何可說般若波羅蜜多於五波羅蜜多，為最為勝、為尊為高、為妙為微妙、為上為無上、無等無等等？」（大正 7，323c14-20）

²⁷ 身=鳥【元】【明】。（大正 25，633d，n.8）

²⁸ 微=最【石】。（大正 25，633d，n.9）

²⁹ 《大般若波羅蜜多經》卷 460〈68 巧便品〉：

具壽善現復白佛言：「波羅蜜多及一切法，若隨實義皆無此彼勝劣差別，何緣故說般若波羅蜜多於五波羅蜜多，為最為勝、為尊為高、為妙為微妙、為上為無上、無等無等等？」（大正 7，324a10-14）

³⁰ 《大般若波羅蜜多經》卷 460〈68 巧便品〉：

佛告善現：「如是！如是！如汝所說。若隨實義，波羅蜜多及一切法，皆無此彼勝劣差別，但依世俗言說作用，說有此彼勝劣差別。施設布施波羅蜜多乃至般若波羅蜜多，為欲度脫諸有情類世俗作用生老病死，然諸有情生老病死皆非實有但假施設。所以者何？有情無故，當知諸法亦無所有，甚深般若波羅蜜多達一切法都無所有，能拔有情世俗作用生老病死，由斯故說般若波羅蜜多於五波羅蜜多，為最為勝、為尊為高、為妙為微妙、為上為無上、無等無等等。」（大正 7，324a14-25）

³¹ 寶=實【聖】。（大正 25，633d，n.11）

於五波羅蜜中第一、最上、最妙。」

3、明般若不住故，能攝導眾善至薩婆若

(1) 釋「不取不捨義」

A、般若住不住法故，能導眾善至薩婆若

須菩提白佛言：「世尊！佛以³²何意故說般若波羅蜜最上、最妙？」

佛告須菩提：「是³³般若波羅蜜取（633c）一切善法到薩婆若中，住不住故。」³⁴

B、不憶念一切法故，般若於諸法不取不捨

(A) 諸法皆不可取捨故般若無取捨

a、正明

須菩提白佛言：「世尊！般若波羅蜜有法可取、可捨不？」

佛言：「不也！須菩提！般若波羅蜜無法可取、無法可捨。」

b、釋因

何以故？一切法不可取、不可捨故。」

(B) 不憶念取相故，不取色乃至無上菩提

a、正明

「世尊！般若波羅蜜於何等法不取不捨？」

佛言：「般若波羅蜜於色不取不捨，於受想行識乃至阿耨多羅三藐三菩提不取不捨。」

b、釋因

「世尊！云何不取色乃至不取阿耨多羅三藐三菩提？」

佛言：「若菩薩不念色乃至不念阿耨多羅三藐三菩提，是名不取色³⁵乃至不取阿耨多羅三藐三菩提。」³⁶

(2) 辨「不念不著義」

A、正明

須菩提言：「世尊！若不念色乃至不念阿耨多羅三藐三菩提，云何得增益善根？善根不增，云何具足諸波羅蜜？若不具足諸波羅蜜，云何得阿耨多羅三藐三菩提？」

³² [以] — 【宋】【元】【明】【聖】。(大正 25, 633d, n.13)

³³ [是] — 【宋】【元】【明】。(大正 25, 633d, n.14)

³⁴ (1) 《放光般若經》卷 16〈70 漚想品〉：

佛告須菩提：「以般若波羅蜜總持諸善功德之法，以無處所住於薩婆若。」(大正 8, 110a6-8)

(2) 《大般若波羅蜜多經》卷 460〈68 巧便品〉：

佛告善現：「由此般若波羅蜜多，以無所得而為方便，普能攝取一切善法，和合趣入一切智智，安住不動故。我數數讚說般若波羅蜜多。」(大正 7, 324b4-7)

³⁵ [是於……不取色] 二百八字 — 【宮】。(大正 25, 633d, n.12)

³⁶ 《大般若波羅蜜多經》卷 460〈68 巧便品〉：

佛告善現：「甚深般若波羅蜜多不思惟色，是故於色無取無捨；乃至不思惟一切智智，是故於一切智智無取無捨。」(大正 7, 324c11-13)

佛告須菩提：「若菩薩不念色乃至不念阿耨多羅三藐三菩提，是時善根增益；善根增益故，具足諸波羅蜜；諸波羅蜜具足故，得阿耨多羅三藐三菩提。何以故？不念色乃至不念阿耨多羅三藐三菩提時，便得阿耨多羅三藐三菩提。」

B、釋因

「世尊！何因緣故，色不念時乃至阿耨多羅三藐三菩提不念時，便得阿耨多羅三藐三菩提？」

佛言：「以念故著欲界、色界、無色界，不念故無所著。如是，須菩提！菩薩摩訶薩行般若波羅蜜，不應有所著。」

(3) 辨「不著不住義」

A、正明

「世尊！菩薩摩訶薩如是行般若波羅蜜，當住何處？」

佛言：「菩薩摩訶薩如是行，不住色，乃至不住一切種智。」

B、釋因

「世尊！何因緣故，色中不住，乃至一切種智中不住？」

佛言：「不著故不住。何以故？是菩薩不見有法可著、可住。」

C、結成

如是，須菩提！（634a）菩薩摩訶薩以不著、不住法，行般若波羅蜜。³⁷

(二) 明學般若得有得有失

I、明失

(1) 著人法空失

須菩提！若菩薩摩訶薩作是念：『若能如是行、如是修，是行般若波羅蜜；我今行般若波羅蜜、修般若波羅蜜。』

若如是取相，則遠離般若波羅蜜；若遠離般若波羅蜜，則遠離檀波羅蜜乃至遠離一切種智。何以故？般若波羅蜜無有著處、亦無著者，自性無故。

(2) 著般若無性失

菩薩摩訶薩若復如是取相，則於般若波羅蜜退；若退般若波羅蜜，則是退阿耨多羅三藐三菩提，不得受記。

(3) 著菩薩道失

菩薩摩訶薩復作是念：『住是般若波羅蜜，能生檀波羅蜜乃至能生大悲。』

若作是念，則為失般若波羅蜜；失般若波羅蜜者³⁸，則不能生檀波羅蜜³⁹乃至不能⁴⁰生大悲。

³⁷ 《大般若波羅蜜多經》卷 460〈68 巧便品〉：「善現！如是菩薩摩訶薩以無所著及無安住而為方便，精勤修學甚深般若波羅蜜多。」（大正 7，325a27-29）

³⁸ 〔者〕—【宮】。（大正 25，634d，n.1）

³⁹ 〔則不能生檀波羅蜜〕—【宋】【宮】。（大正 25，634d，n.2）

⁴⁰ 〔不能……法〕十七字—【聖】。（大正 25，634d，n.3）

(4) 著佛道起佛見失

菩薩若復作是念：『諸佛知諸法無受相故，得阿耨多羅三藐三菩提。』菩薩若作如是演說、開示、教詔⁴¹，則失般若波羅蜜。

何以故？佛⁴²於諸法無所知、無所得，亦無法可說，何況當有所得！無有是處！」⁴³

2、明得

(1) 念諸法無所有、無可取、無所得，是行般若

A、須菩提問

須菩提白佛言：「世尊！菩薩行般若波羅蜜，云何無是過失？」

B、佛答

佛言：「若菩薩摩訶薩行般若波羅蜜，作是念：『諸法無所有、不可取；若法無所有、不可取，則無所⁴⁴得。若如是行，為行般若波羅蜜。』

若菩薩摩訶薩著無所有法，則遠離般若波羅蜜。何以故？般若波羅蜜中無有著法故。」

(2) 於一切法離自相不著，則般若等生

A、須菩提問

須菩提白佛言：「世尊！般若波羅蜜遠離般若波羅蜜耶⁴⁵？檀波羅蜜遠離檀波羅蜜耶？乃至⁴⁶一切種智遠離一切種智⁴⁷耶？」

世尊！若般若波羅蜜遠離般若波羅蜜，乃至一切種智遠離一切種智，菩薩云何得般若波羅蜜乃至得一切種智？」

B、佛答

(A) 明一切法不生，則般若等生

a、破人法著

佛言：「菩薩摩訶(634b)薩行般若波羅蜜時，不生色——是色，誰色；乃至一切種智不生——是一切種智，誰一切種智。如是菩薩能生般若波羅蜜乃至能生一切種智。⁴⁸

⁴¹ (1) 詔=照【聖】【石】。(大正 25, 634d, n.4)

(2) 詔(出幺、)：1.告知。2.教導，告誡。(《漢語大詞典》(十一)，p.129)

⁴² (諸)+佛【石】。(大正 25, 634d, n.5)

⁴³ 《大般若波羅蜜多經》卷 460〈68 巧便品〉：

復次，善現！若菩薩摩訶薩作如是念：「佛知諸法無攝受相，自證無上正等菩提。得菩提已，為諸有情宣說開示諸法實相。」是菩薩摩訶薩則為退失甚深般若波羅蜜多。

何以故？善現！如來於法無知、無覺、無說、無示。所以者何？諸法實性不可知覺、不可施設，云何得有知覺說示一切法者？若言實有知覺說示一切法者，無有是處。(大正 7, 325c27-326a6)

⁴⁴ 無所=不可【石】。(大正 25, 634d, n.6)

⁴⁵ 耶=取【聖】。(大正 25, 634d, n.7)

⁴⁶ [遠離……至]九字—【聖】。(大正 25, 634d, n.8)

⁴⁷ [遠離……智]六字—【聖】。(大正 25, 634d, n.9)

⁴⁸ 《大般若波羅蜜多經》卷 460〈68 巧便品〉：「復次，善現！諸菩薩摩訶薩修行般若波羅蜜多，

b、破顛倒見

復次，須菩提！菩薩摩訶薩行般若波羅蜜時，不觀色若常若無常、若苦若樂、若我若非我、若空若不空、若離若非離。

(B) 釋因由

何以故？自性不能生自性。

乃至一切種智亦如是。

(C) 結行得

若菩薩摩訶薩行般若波羅蜜，如是觀色乃至觀一切種智，能生般若波羅蜜乃至能生一切種智。

三、舉喻結歎般若最勝**(一) 四兵隨從聖王喻**

譬如轉輪聖王有所至處，四種兵⁴⁹皆隨從；般若波羅蜜亦如是，有所至處，五波羅蜜皆悉隨從到薩婆若中住。

(二) 善御駕駟喻

譬如善御⁵⁰駕駟⁵¹，不失平道，隨意所至；般若波羅蜜亦如是，御五波羅蜜不失正道，至薩婆若。」⁵²

(貳) 為度眾生行方便，當學般若**一、明般若為大事故起——示是道、是非道****(一) 明菩薩道與非菩薩道**

須菩提言：「世尊！何等是菩薩摩訶薩道？何等是非道？」

佛言：「聲聞道非菩薩道，辟支佛道非菩薩道；一切種⁵³智道是菩薩摩訶薩道。⁵⁴須菩提！是名菩薩摩訶薩道、非道。」

不執著色——謂此是色，此色屬彼；亦不執著受、想、行、識——謂此是受、想、行、識，此受、想、行、識屬彼；如是乃至不執著一切智智——謂此是一切智智，此一切智智屬彼。善現！是菩薩摩訶薩於如是一切法無執著故，便能引發般若波羅蜜多乃至布施波羅蜜多，乃至能引發一切智智。何以故？善現！若菩薩摩訶薩修行般若波羅蜜多，於諸法中有所執著——謂此是法，此法屬彼——則不能隨意引發安住勝妙功德。」(大正 7，326b5-15)

⁴⁹ 《大智度論疏》卷 24：

「四兵」者，謂車、馬、步、象等也。當說。(已新續藏 46，917b1-2)

⁵⁰ 御(口、)：1.駕馭車馬。(《漢語大詞典》(三)，p.1021)

⁵¹ 駟(厶、)：1.古代一車套四馬，因以稱駕一車之四馬或四馬所駕之車。(《漢語大詞典》(十二)，p.815)

⁵² 《大般若波羅蜜多經》卷 460〈68 巧便品〉：「善現！如善御者駕四馬車，令避險路行於正道，隨本意欲能往所至。甚深般若波羅蜜多亦復如是，善御一切波羅蜜多及餘一切菩提分法，令避生死涅槃險路，行於自利利他正道，至本所求一切智智。」(大正 7，326c23-28)

⁵³ [種]—【宋】【宮】【聖】。(大正 25，634d，n.10)

⁵⁴ 《大般若波羅蜜多經》卷 460〈68 巧便品〉：

佛告善現：「諸異生道、若聲聞道、若獨覺道，非諸菩薩摩訶薩道，依此不能往一切智智故；甚深般若波羅蜜多所引六種波羅蜜多，是諸菩薩摩訶薩道，依此定能往一切智智故。」(大正 7，326c29-327a4)

（二）歎般若是菩薩導，為大事故起，令離二乘住薩婆若

須菩提言：「世尊！諸菩薩摩訶薩般若波羅蜜為大事故起，所謂示是道、是非道。」

佛言：「如是！如是！須菩提！般若波羅蜜為大事故起，所謂示是道、是非道。

須菩提！是般若波羅蜜為度無量眾生故起，為利益阿僧祇眾生故起。

般若波羅蜜雖作是利益，亦不受色，亦不受受、想、行、識；亦不受聲聞、辟支佛地。

須菩提！般若波羅蜜是諸菩薩摩訶薩導，示阿耨多羅三藐三菩提，能令離聲聞、辟支佛地，住薩婆若。般若波羅蜜無所生、無所滅，諸法常住故。」⁵⁵

（三）般若雖無生無滅，而不妨行六度

1、須菩提問

須菩提言：「世尊！若般若波羅蜜無所生、無所滅，云何菩薩摩訶薩（634c）行般若波羅蜜時應布施？云何應持戒？云何應修忍？云何應勤精進？云何應入禪定？云何應修智慧？」

2、佛答

（1）念薩婆若，應行六度

佛告須菩提：「菩薩摩訶薩念薩婆若應布施，念薩婆若應持戒、忍辱、精進、禪定、智慧。」⁵⁶

（2）功德與眾生共，迴向佛菩提

是菩薩摩訶薩持是功德與眾生共之，應⁵⁷迴向阿耨多羅三藐三菩提。

若如是迴向，則具足修六波羅蜜乃至⁵⁸慈悲心諸功德。

須菩提！若菩薩摩訶薩不遠離六波羅蜜，則不遠離薩婆若。⁵⁹

（3）結勸修六度

以是故，須菩提！菩薩摩訶薩欲得阿耨多羅三藐三菩提，應學應行六波羅蜜；菩

⁵⁵ 《大般若波羅蜜多經》卷 460〈68 巧便品〉：

善現當知！甚深般若波羅蜜多，雖作無邊利樂他事，而於此事無所取著。

復次，善現！甚深般若波羅蜜多，雖能示現色所作事，而於此事無所取著；雖能示現受、想、行、識所作事，而於此事無所取著。如是乃至雖能示現一切智智所作事，而於此事無所取著；雖能示現聲聞、獨覺所作事，而於此事無所取著。

善現！甚深般若波羅蜜多，雖能引導一切菩薩摩訶薩眾，令趣無上正等菩提，遠離聲聞、獨覺等地，而於諸法無生無滅，以法住性為定量故。（大正 7，327a14-25）

⁵⁶ 《大般若波羅蜜多經》卷 460〈68 巧便品〉：

佛告善現：「諸菩薩摩訶薩修行般若波羅蜜多時，緣一切智智，為諸有情應行布施，應持淨戒，應起安忍，應勤精進，應住靜^{*}處，應修般若。」（大正 7，327a29-b3）

※案：《大正藏》原作「精」，今依《高麗藏》作「靜」（第 4 冊，82b6）。

⁵⁷ 〔應〕—【宋】【元】【明】【宮】。（大正 25，634d，n.12）

⁵⁸ 乃至=及【宋】【元】【明】【宮】【聖】，=乃【石】。（大正 25，634d，n.13）

⁵⁹ 《大般若波羅蜜多經》卷 460〈68 巧便品〉：「善現！是菩薩摩訶薩持此善根，與諸有情同共迴向一切智智。如是迴向一切智智，則修六種波羅蜜多速得圓滿，亦修菩薩慈、悲、喜、捨速得圓滿，乃至安坐妙菩提座，常不遠離如是六種波羅蜜多；若不遠離如是六種波羅蜜多，則不遠離一切智智。」（大正 7，327b3-9）

薩摩訶薩行六波羅蜜，具足一切善根，當得阿耨多羅三藐三菩提。

以是故，須菩提！菩薩摩訶薩應習行六波羅蜜！」

二、觀法無合散，依無所住行六度

(一) 須菩提問

須菩提言：「世尊！云何菩薩摩訶薩應習行六波羅蜜？」

(二) 佛答

1、觀諸法不合不散

佛言：「菩薩摩訶薩應如是觀——色不合不散，受、想、行、識不合不散，乃至一切種智不合不散。是名菩薩摩訶薩習行六波羅蜜。⁶⁰

2、觀諸法無所住

復次，須菩提！菩薩摩訶薩應作是念：『我當不住色中，不住受、想、行、識中，乃至不住一切種智中。如是應習行六波羅蜜。何以故？是色無所住，乃至薩婆若無所住。』如是，須菩提！菩薩摩訶薩以無所⁶¹住法習行六波羅蜜，應當得阿耨多羅三藐三菩提。⁶²

三、欲上求下化，應習學六度

(一) 如士夫種樹，欲得無上菩提果，應行六度化眾生

須菩提！譬如士夫欲食菴⁶³羅果⁶⁴、若波羅⁶⁵那婆果⁶⁶，當種其子，隨時澆灌、守護，漸漸生長，時節和合，便有果實得而食之。⁶⁷

⁶⁰ 《大般若波羅蜜多經》卷 460〈68 巧便品〉：

佛告善現：「若菩薩摩訶薩如實觀色非相應非不相應，如實觀受、想、行、識非相應非不相應，乃至如實觀一切智智非相應非不相應，是菩薩摩訶薩能與六種波羅蜜多，常共相應，不相捨離。」(大正 7, 327b17-22)

⁶¹ 〔所〕—【宋】【元】【明】【宮】。(大正 25, 634d, n.14)

⁶² 《大般若波羅蜜多經》卷 460〈68 巧便品〉：

復次，善現！若菩薩摩訶薩恒作是念：「我不應住色，亦不應住非色；我不應住受、想、行、識，亦不應住非受、想、行、識；乃至我不應住一切智智，亦不應住非一切智智。何以故？色非能住非所住，受、想、行、識亦非能住非所住，如是乃至一切智智非能住非所住故。」善現！是菩薩摩訶薩能與六種波羅蜜多常共相應，不相捨離。善現！若菩薩摩訶薩能以如是無住方便，修行六種波羅蜜多，是菩薩摩訶薩疾能證得一切智智。(大正 7, 327b22-c2)

⁶³ 菴=掩【石】。(大正 25, 634d, n.15)

⁶⁴ (1) 《一切經音義》卷 23：「菴羅林(菴羅，果名，狀貌似此方奈，其味如梨也)。」(大正 54, 453a24)

(2) 《一切經音義》卷 25：「菴羅果(此無正翻，狀如木瓜，其味香甜，經取生熟難分者也)。」(大正 54, 471b16)

(3) 《一切經音義》卷 26：「菴羅果(此果形如梨，味極甘美)。」(大正 54, 477c13)

⁶⁵ 〔羅〕—【宋】【宮】。(大正 25, 634d, n.16)

⁶⁶ 《一切經音義》卷 4：「菴沒羅果，半娜娑果(竝梵語。西國果名也。此國竝無。其半娜娑果，形如冬瓜，其味甚美。或名麼那娑)。」(大正 54, 328b23-24)

⁶⁷ 《大般若波羅蜜多經》卷 460〈68 巧便品〉：「善現！譬如有人欲食菴沒羅果或半娜娑果，先取其子於良美田而種植之，隨時澆灌，守護營理，漸次生長芽莖枝葉，時節和合便有華果，果成熟已取而食之。」(大正 7, 327c2-6)

須菩提！菩薩摩訶薩亦如是，欲得阿耨多羅三藐三菩提，當學六波羅蜜，以布施攝取眾生，持戒、忍辱、精進、禪定、智慧攝取眾生，度眾生生死⁶⁸。如是⁶⁹行，當得阿耨多羅三藐三菩提（635a）提。⁷⁰

（二）欲得諸功德，當學般若

1、欲不隨他語

以是故，須菩提！菩薩摩訶薩欲不隨他人語，當學般若波羅蜜。

2、欲嚴土熟生

欲淨佛國土、成就眾生，欲坐道場，欲轉法輪，當學般若波羅蜜。」⁷¹

3、欲於法自在

須菩提白佛言：「世尊！應如是學般若波羅蜜耶？」

佛言：「菩薩應如是學般若波羅蜜。欲於諸法得自在，當學般若波羅蜜。何以故？學是般若波羅蜜，於一切諸法中得自在故。

4、欲得三乘道

復次，般若波羅蜜於一切諸法中最大。譬如大海，於萬川中最大；般若波羅蜜亦如是，於一切諸⁷²法中最大。

以是故，諸欲求聲聞、辟支佛道⁷³及諸菩薩道，應當學般若波羅蜜、檀波羅蜜乃至一切種智。

5、欲勝諸魔怨

須菩提！譬如射師，執⁷⁴如意弓箭，不畏怨敵；菩薩摩訶薩亦如是，行般若波羅蜜乃至一切種智，魔、若魔天所不能壞。

以是故，須菩提！菩薩摩訶薩欲得阿耨多羅三藐三菩提，應學般若波羅蜜。

6、十方諸佛護念

（1）正明佛護念

是行般若波羅蜜菩薩，為十方諸佛所念。」

⁶⁸ 死+（以）【元】【明】。（大正 25，634d，n.17）

⁶⁹ 〔如是……提〕十四字—【宋】【宮】【聖】【石】。（大正 25，634d，n.18）

⁷⁰ 《大般若波羅蜜多經》卷 460〈68 巧便品〉：「如是，善現！若菩薩摩訶薩欲得無上正等菩提，先學六種波羅蜜多，復於有情或以布施，或以愛語，或以利行，或以同事而攝受之。既攝受已，教令安住布施、淨戒、安忍、精進、靜慮、般若波羅蜜多；既安住已，解脫一切生老病死，證得常住畢竟安樂。菩薩如是當得無上正等菩提，轉妙法輪，度無量眾。」（大正 7，327c6-13）

⁷¹ 《大般若波羅蜜多經》卷 460〈68 巧便品〉：「是故，善現！若菩薩摩訶薩欲於諸法不藉他緣而自悟解、欲能成熟一切有情、欲於佛土能善嚴淨、欲疾安坐妙菩提座、欲能降伏一切魔軍、欲疾證得一切智智、欲轉法輪，脫有情眾生老病死，證得常住畢竟安樂，應學六種波羅蜜多，以四攝事方便攝受諸有情眾；既攝受已，應令安住布施、淨戒、安忍、精進、靜慮、般若波羅蜜多。菩薩如是勤修學時，應於般若波羅蜜多常勤修學。」（大正 7，327c13-22）

⁷² 〔諸〕—【宋】【元】【明】【宮】。（大正 25，635d，n.3）

⁷³ 〔道〕—【宋】【元】【明】【宮】。（大正 25，635d，n.4）

⁷⁴ 〔波羅……執〕十七字—【聖】。（大正 25，635d，n.5）

(2) 釋因**A、菩薩雖行六度，亦觀畢竟空不可得**

須菩提白佛言：「世尊！云何十方諸佛念是菩薩摩訶薩？」

佛告須菩提：「菩薩摩訶薩行檀波羅蜜時，十方諸佛皆念；行尸羅波羅蜜、羼提波羅蜜、毘梨耶波羅蜜、禪波羅蜜、般若波羅蜜時，十方諸佛皆念。

云何念？布施不可得，持戒、忍辱、精進、禪定、智慧不可得，乃至一切種智不可得。

菩薩能如是不得諸法故，諸佛念是菩薩摩訶薩。

B、諸佛不取相而護念

復次，須菩提！諸佛不以色故念，不以受、想、行、識故念，乃至不以一切種智故念。」

(參) 得此方便，則於一切法皆明了**一、菩薩雖多有所學，而實無所學**

須菩提言：「世尊！菩薩摩訶薩多有所學，實無所學。⁷⁵」

佛言：「如是！如是！須菩提！菩薩多有所學，實無所學。

何以故？是菩薩所學諸法皆不可得。」⁷⁶

二、菩薩學略攝般若，則知諸法略廣相**(一) 勸學六度若略、若廣，則能知一切法略廣相**

須(635b) 菩提白佛言：「世尊！佛所說法，若略、若廣⁷⁷；於此法中，諸菩薩摩訶薩欲求阿耨多羅三藐三菩提，六波羅蜜若略、若廣，應當受持、親近、讀、誦；讀誦已，思惟、正觀，心、心數法不行故。」⁷⁸

⁷⁵ 《大智度論疏》卷 24：

「多有所學實無所學」已下第四，明菩薩善學波若雙照二諦，照達方便也。當說。(卍新續藏 46, 917b3-4)

⁷⁶ 《大般若波羅蜜多經》卷 461〈68 巧便品〉：

具壽善現復白佛言：「諸菩薩摩訶薩雖多處學而無所學。」

佛告善現：「如是！如是！諸菩薩摩訶薩雖多處學而無所學。所以者何？實無有法可令菩薩摩訶薩眾於中修學。」(大正 7, 328c6-9)

⁷⁷ 《大智度論疏》卷 24：

「若略若廣相」已下，略相即是總相，廣相即是別相，大小兩乘盡有此總、別二相也。當說。(卍新續藏 46, 917b4-6)

⁷⁸ (1) 《放光般若經》卷 16〈70 漚愆品〉：

須菩提言：「世尊！所說法多少，菩薩皆當受行。菩薩欲得阿耨多羅三耶三菩者，六波羅蜜事若多若少皆當受行、當堅持，常當觀念，令意不轉。菩薩於六波羅蜜皆當盡學，於諸法多者少者亦當盡學知。」(大正 8, 111a29-b4)

(2) 《大般若波羅蜜多經》卷 461〈68 巧便品〉：

具壽善現復白佛言：「世尊！為諸菩薩摩訶薩或略或廣宣說六種波羅蜜多相應之法，若菩薩摩訶薩欲疾證得一切智智，於此六種波羅蜜多相應法教，若略若廣皆應聽聞、受持、讀誦、究竟通利，既通利已如理思惟，既思惟已審正觀察，正觀察已，令心、心所於所緣相皆不復轉。」(大正 7, 328c9-16)

佛告須菩提：「如是！如是！⁷⁹菩薩摩訶薩略廣學六波羅蜜，當知一切法略廣相。」⁸⁰

（二）以四門辨，知一切法略廣之相

1、須菩提問

須菩提言：「世尊！云何菩薩摩訶薩知一切法略廣相？」

2、佛答

（1）約如明

佛言：「知色如相，知受、想、行、識乃至知一切種智如相，如是能知一切法略廣相。」

須菩提言：「世尊！云何色如相？云何受、想、行、識乃至一切種智如相？」

佛告須菩提：「色如相⁸¹——無生、無滅、無住異，是名色如相；乃至一切種智如相——無生、無滅、無住異，是名一切種智如相。是中菩薩摩訶薩應學。」⁸²

（2）約實際（無際）明

「復次，須菩提！菩薩摩訶薩知諸法實際時，知一切法略廣相。」

「世尊！何等是諸法實際？」

佛言：「無際是名實際。菩薩學是際，知⁸³一切諸法略廣相。⁸⁴

（3）約法性明

須菩提！若菩薩摩訶薩知諸法法性，是菩薩能知一切法略廣相。」

「世尊！何等是諸法法性？」

佛言：「色性是名法性，是性無分、無非分。須菩提！菩薩摩訶薩知法性⁸⁵故，知一切法略廣相。」⁸⁶

⁷⁹ 《大智度論疏》卷 24：

「佛告須菩提：如是如是」已下，上善吉既其高讚故，如來可之，明菩薩以波若方便故能即總知別達一切法略廣相也。（卍新續藏 46，917b6-8）

⁸⁰ 《大般若波羅蜜多經》卷 461〈68 巧便品〉：

佛告善現：「如是！如是！如汝所說。復次，善現！諸菩薩摩訶薩於佛世尊所說六種波羅蜜多相應法教若略若廣勤修學時，應於諸法如實了知略廣之相。」（大正 7，328c16-19）

⁸¹ 〔相〕—【宋】【元】【明】【宮】。（大正 25，635d，n.6）

⁸² 《大般若波羅蜜多經》卷 461〈68 巧便品〉：

佛告善現：「色真如無生無滅，亦無住異而可施設，是名色真如相；受、想、行、識真如無生無滅，亦無住異而可施設，是名受、想、行、識真如相；乃至一切智智真如無生無滅，亦無住異而可施設，是名一切智智真如相。諸菩薩摩訶薩如實了知當於中學，於一切法如實了知略廣之相。」（大正 7，329a28-b6）

⁸³ 知=智【聖】。（大正 25，635d，n.7）

⁸⁴ 《大般若波羅蜜多經》卷 461〈68 巧便品〉：

佛告善現：「無色際是名色實際相，無受、想、行、識際是名受、想、行、識實際相，乃至無一切智智際是名一切智智實際相。諸菩薩摩訶薩如實了知當於中學，於一切法如實了知略廣之相。」（大正 7，329b12-16）

⁸⁵ 〔性〕—【聖】。（大正 25，635d，n.8）

⁸⁶ 《大般若波羅蜜多經》卷 461〈68 巧便品〉：

佛告善現：「色如虛空，無障無礙、無生無滅、無斷無續而可施設，是名色法界相；受、想、

(4) 約不合不散明**A、正說**

須菩提白佛言：「世尊！復云何應知一切法略廣相？」

佛言：「若菩薩摩訶薩知一切法不合不散。」

須菩提言：「世尊！何等法不合不散？」

佛言：「色不合不散，受、想、行、識不合不散，乃至一切種智不合不散。有為性、無為性不合不散。」

B、釋因

何以故？是諸法自性無，云何有合有散？若法自性無，是為非法，非法不合不散。如是，應當知一切法略廣相。」⁸⁷

(三) 勸學略攝般若

須菩提言：「世尊！是名菩薩摩訶薩略攝般若波羅蜜。(635c)

世尊！是略攝般若波羅蜜中，初發意菩薩摩訶薩應學，乃至十地菩薩摩訶薩亦應學。是菩薩摩訶薩學是略攝般若波羅蜜，則知一切法略廣⁸⁸相。」

【論】⁸⁹釋曰：

壹、歎菩薩成就方便力**(壹) 明往昔因行****一、發心已歷無量劫數**

須菩提聞菩薩摩訶薩大利根相——所謂一波羅蜜邊能生五波羅蜜，行一波羅蜜即能具五波羅蜜，如上品⁹⁰中說；是事希有，故問佛：「是菩薩發心已來，為幾時能得如是方便？」

佛答：「是菩薩發心已來，除大菩薩，於餘眾生無量億阿僧祇劫。」

二、已供養如恆河沙等諸佛

或有菩薩發心已來無量億阿僧祇劫，大罪因緣覆心故不見佛，不親近供養。是故問：「是菩薩為供養幾佛？」

佛答：「是菩薩為已供養如恆河沙等諸佛。」

上言「無量億阿僧祇」，今言「恆河沙」者，多數理同故。

行、識如虛空，無障無礙、無生無滅、無斷無續而可施設，是名受、想、行、識法界相；乃至一切智智如虛空，無障無礙、無生無滅、無斷無續而可施設，是名一切智智法界相。諸菩薩摩訶薩如實了知當於中學，於一切法如實了知略廣之相。」(大正 7, 329b23-c1)

⁸⁷ 《大般若波羅蜜多經》卷 461〈68 巧便品〉：「所以者何？如是諸法皆無自性，若無自性則無所有，若無所有則不可說有合有散，諸菩薩摩訶薩於一切法如是了知，則能了知略廣之相。」(大正 7, 330a2-5)

⁸⁸ [廣] — 【宮】。(大正 25, 635d, n.9)

⁸⁹ [論] — 【宋】【宮】【聖】。(大正 25, 635d, n.10)

⁹⁰ 《正觀》(6), p.199:「上品」指〈68 六度相攝品〉(大正 25, 623b7-625b22)。

三、具足六度諸善根

有菩薩久發心，雖多以華香供養諸佛，而未能種善根，作是念：「我必當得果報，深心行六波羅蜜故。」若以深心行六波羅蜜，為阿耨多羅三藐三菩提故作功德，是名「種善根」。是故第三問：「種何等善根？」

佛答：「是菩薩從初發心已來，具足行六波羅蜜。一切福德無不作者，一切善法無不修集。」

（貳）歎人希有

須菩提聞已，歡喜白佛言⁹¹：「希有！世尊！是菩薩能如是行方便。」

所謂未斷諸煩惱、未離生死，而能勝斷煩惱、離生死法者。

無始生死已來集諸惡法，菩薩心後來，而能用後來心，不隨先所集惡心，是為希有！一切眾生無恩於菩薩，而菩薩常欲利益。是諸眾生或欲奪菩薩命、割截身體，菩薩欲以⁹²第一佛樂智慧命欲與眾（636a）生。

如是等，是為希有！

貳、讚歎菩薩方便妙用

（壹）般若能導萬行至無上菩提

一、舉喻歎般若為萬行之首

（一）釋「第一日月周行照天下喻」，明般若之益

佛可須菩提所說，欲令⁹³此事明了故作譬喻——

如日月照四天下，若無日月，則百穀藥草及眾生無以生長。

月是陰氣，日是陽氣，二氣和合故萬物成長，是故日月於四天下大有利益。

菩薩亦如是，於四生中，以大悲心憐愍眾生故，能隨所願行一切善法；大智慧力故，破眾生著善法心。如是六波羅蜜等諸善增長成就，直至阿耨多羅三藐三菩提。

又復眾生雖復有眼，若無日月，則無所見；眾生雖有世俗善根利智，不得般若波羅蜜照明，尚不得二乘，何況得阿耨多羅三藐三菩提！

（二）釋「第二具輪寶乃名輪王喻」、「第三有夫之婦難可侵喻」

1、若不得般若波羅蜜，則不得名「波羅蜜」

又復菩薩雖行五波羅蜜，不得般若波羅蜜，不得⁹⁴名「波羅蜜」，以不破著心故。⁹⁵

2、釋「第三有夫之婦難可侵喻」，明有般若則不可壞⁹⁶

若菩薩乃至能自以身命布施，若無般若，其心易破——如無夫之婦，侵凌⁹⁷則易——若有般若，則不可破壞。

⁹¹ 〔言〕—【宋】【元】【明】【宮】。（大正 25，635d，n.13）

⁹² 以=與【石】。（大正 25，635d，n.15）

⁹³ 令=合【聖】。（大正 25，636d，n.1）

⁹⁴ 得=復【聖】。（大正 25，636d，n.2）

⁹⁵ 案：此句依經「五波羅蜜亦如是，若離般若波羅蜜，不得波羅蜜名字」，應屬「輪寶喻」。

⁹⁶ 案：依經順序，輪寶喻為第二，有夫無夫之婦喻為第三。

⁹⁷ 凌=浚【宋】【宮】，=陵【元】【明】【聖】。（大正 25，636d，n.13-2）

3、釋「第二具輪寶乃名輪王喻」，明得般若方名為菩薩

菩薩雖行種種諸餘深法，不得般若，不名為「行波羅蜜」，但名為「行善法」，有量有盡故。

此中說譬喻：轉輪聖王雖有千子、八萬四千小王及六寶⁹⁸，不得名為轉輪聖王，不能飛行⁹⁹到四天下；若天遣¹⁰⁰金輪寶至，乃¹⁰¹得名為轉輪聖王。

菩薩亦如是，雖有布施等諸善法，不得般若波羅蜜故，不名為「菩薩為行六波羅蜜人」，不能除障礙、行菩薩道故。

(三) 釋「第四軍將具足鎧仗喻」，明具般若則不可壞

譬如健將，善知戰法，器仗¹⁰²具足，不畏怨敵。

「健將」即是菩薩，「器仗」是般若。

「增上慢」者，未得聖道，意謂已得。

菩薩說畢竟空法；是人行善法，心不同故，毀壞菩薩。

外道、梵志等及諸魔民，乃至菩(636b)薩旃陀羅者。

「菩薩旃陀羅」者，如〈魔品〉中說：「聞魔來稱其名字而與受¹⁰³記，而生輕慢。」¹⁰⁴

(四) 釋「第五小王朝宗輪王喻」、「第六萬流入大海喻」，明般若攝五度入薩婆若**1、標宗義**

復次，為般若波羅蜜故說五波羅蜜；若人能直行諸法實相，則不為說布施等入般若初門。以人鈍根、罪重故，種種因緣說——以布施破慳；持戒折薄諸煩惱；忍辱開福德門，能行難事；精進如風吹火，熾然不息；禪定攝心一定，觀諸法實相故。

2、法喻合

是五波羅蜜皆趣向般若波羅蜜，如諸小王朝宗轉輪聖王。

如一切眾流皆入大海；布施等諸善法亦如是，為般若波羅蜜所守護故，得至薩婆若。

※ 因論生論：云何言「五度為般若守護故得入薩婆若」

問曰：五波羅蜜如諸川流，般若波羅蜜應如大海；今何以言「五波羅蜜為般若波羅蜜所守護故，得入薩婆若」？

答曰：汝不聞先說「般若種種名字」耶？「薩婆若」即是「般若」異名。

五波羅蜜福德入般若波羅蜜中，即得清淨般若；般若清淨故，得佛道，變名「薩婆若」。¹⁰⁵是故言「入薩婆若」，即是「入般若」。

⁹⁸ 六寶：象寶、馬寶、珠寶、玉女寶、居士寶（主藏臣寶）、主兵臣寶。

⁹⁹ 〔行〕—【宋】【元】【明】【宮】【聖】。(大正 25, 636d, n.3)

¹⁰⁰ 遣：1.派遣，差遣。(《漢語大詞典》(十)，p.1135)

¹⁰¹ 至乃=乃至【聖】。(大正 25, 636d, n.4)

¹⁰² 仗=杖【石】。(大正 25, 636d, n.5)

¹⁰³ 受=授【元】【明】。(大正 25, 636d, n.7)

¹⁰⁴ 《正觀》(6)，p.199：《摩訶般若波羅蜜經》卷 18〈61 夢誓品〉(大正 8, 353b20-27)；《放光般若經》卷 14〈62 阿惟越致相品〉(大正 8, 97a18-26)。

¹⁰⁵ 《正觀》(6)，pp.199-200：

(1)《大智度論》卷 43 (大正 25, 370c22-371a7)、卷 63 (大正 25, 507a18-21)、卷 72 (大正 25, 563c9-11)、卷 42 (大正 25, 366b20-c4)、卷 83 (大正 25, 643b3-8)。

（五）釋「第七右手作事方便喻」，明般若功用最大

有人疑：諸波羅蜜各各有力，何以獨言「般若波羅蜜功用為大」？

是故言：譬如人之右手，自然穩便；五波羅蜜如左手，不得般若波羅蜜，則所作不便。

（六）釋「第九輪寶前導皆隨王意喻」，明般若為五度之前導

如人開目造事，所作皆成；如導師在前，餘伴隨逐，進止取捨，皆隨導師，不得自在。般若波羅蜜亦如是，導五波羅蜜，所可修集成辦，皆仰般若。

此中佛自說譬喻：如轉輪聖王輪寶在四兵前導，輪住餘寶則住。

「輪」是般若波羅蜜，常在五波羅蜜前¹⁰⁶導，五波羅蜜隨逐。

如《般若》初品中說：「菩薩欲具足檀波羅蜜，不見施者、(636c)受者及財物。」¹⁰⁷先籌量、分別、斷一切著，然後布施——是則般若在前導。

如輪寶伏四天下已，常在王宮，住虛空中。

「聖王」是菩薩；「輪」是般若，破諸魔民煩惱已，入薩婆若宮中住。

是輪無所分別：「我常在前，餘寶在後；無憎愛心——是可來、是不可來。」

般若無分別亦如是：「檀波羅蜜隨我來，尸羅波羅蜜勿來。」如經中廣說。

此中佛自說因緣：「一切法性無所能作。」

二、歎般若勝妙，能攝導萬行

（一）正明般若能攝導萬行

1、諸法雖畢竟空，菩薩當以方便力為眾生行六度

須菩提聞是已，白佛言：「若一切法性空、無所有，云何菩薩行六波羅蜜能得阿耨多羅三藐三菩提？」

佛答：「菩薩行般若，作是念：『諸法雖畢竟空，眾生狂顛倒故，深著不解；我若不以方便力，則不可得度。』」

「方便」者，所謂金色身、三十二相，八十隨形好，無量光明，神通變化——能以一指¹⁰⁸動十方三千大千國土，梵音說法無厭¹⁰⁹，色身，十力、四無所畏、十八不共法、無礙解脫、一切種智、大慈大悲等。

具足無量諸佛法，然後能教化眾生，眾生必能信受。得如是力，假令妄語，人猶當¹¹⁰信，何況實語！

如《經》說「我雖知諸法實相，能¹¹¹入涅槃，但為眾生故行檀波羅蜜」等，如《經》

(2)《摩訶般若波羅蜜經》卷 12〈44 遍歎品〉(大正 8, 311c-313a)。

(3)《放光般若經》卷 10〈45 等品〉(大正 8, 68a-69a)。

¹⁰⁶〔前〕—【聖】。(大正 25, 636d, n.13)

¹⁰⁷《正觀》(6), p.200:《大智度論》卷 11(大正 25, 139a-140a)、卷 12(大正 25, 147b5-150a25)。

¹⁰⁸指=相【宮】。(大正 25, 636d, n.14)

¹⁰⁹厭=能勝【石】。(大正 25, 636d, n.15)

¹¹⁰當=尚【聖】。(大正 25, 636d, n.16)

¹¹¹能=得【石】。(大正 25, 636d, n.17)

中廣說，乃至「不可以異事度眾生」。

2、諸波羅蜜中，般若為最上

(1) 釋「諸度無差別相，云何般若最勝妙」〔依未得聖道之空〕

須菩提白佛言：「世尊！若諸波羅蜜畢竟空故無差別，云何般若波羅蜜於諸波羅蜜中最尊？」

佛可須菩提，畢竟空中諸波羅蜜實無差別。若無般若波羅蜜，諸波羅蜜畢竟空、無差別，誰能知者？若無般若¹¹²，五法云何得波羅蜜名字？

五波羅蜜未入般若時，有差別；既入般若，則無差別。

如諸異色物，到須(637a)彌山邊，皆同一色，不得言：「餘物色皆同，何以獨稱須彌為大？」檀波羅蜜等亦如是，雖無差別，皆是般若力故，不得言¹¹³：「何以獨稱般若為大？」

(2) 釋「隨實義無分別，云何般若最勝妙」〔依已得聖道之空〕

須菩提雖蒙開釋，猶未善解，復以異塗¹¹⁴而問世尊：「若實義中無差別，云何般若於五波羅蜜為上？」

先說「未得聖道空」，今說「得聖道空」，是故說第一實義。第一實義聖道，是最可信，是中亦無差別。

佛可言：「如是！如是！我說六波羅蜜分別，皆為世俗故。何以故？世人不可但為說諸法實相，聞則迷悶，生於疑悔。是故以第一義為心，用世俗語言為說；是故說分別有諸波羅蜜教化眾生。眾生實無有法，皆是空、不生不死、不退不起；色等法亦如是。是¹¹⁵故般若波羅蜜雖空，能示如是事故，而最¹¹⁶上、最妙；譬如玉¹¹⁷女寶，於眾女中為第一而最上、最妙。」

3、明般若不住故，能攝導眾善至薩婆若

(1) 辨「不取不捨義」

A、般若住不住法故，能導眾善至薩婆若

(A) 明理

「須菩提白佛：佛以何意故常說般若最上」者，須菩提種種因緣說般若、五波羅蜜無差別，佛亦然可其所說，而復言「般若最上」。

「佛言：般若波羅蜜守護一切善法，至薩婆若中住」者，一切¹¹⁸雖空，若無般若，一切諸善法皆不能至薩婆若。

¹¹² 〔般若〕—【宮】。(大正 25, 636d, n.18)

¹¹³ 言+ (大)【宋】【元】【明】【石】。(大正 25, 637d, n.1)

¹¹⁴ (1) 塗=徒【石】。(大正 25, 637d, n.2)

(2) 塗：2.道路。3.引申指途徑，門路。(《漢語大詞典》(二)，p.1176)

¹¹⁵ 〔是〕—【宮】。(大正 25, 637d, n.3)

¹¹⁶ 〔而最……妙〕五字—【宋】【元】【明】【宮】【聖】。(大正 25, 637d, n.4)

¹¹⁷ 玉=王【聖】。(大正 25, 637d, n.5)

¹¹⁸ 切+ (法)【宋】【元】【明】【宮】。(大正 25, 637d, n.6)

「善法」者，五波羅蜜、三十七品、大慈悲¹¹⁹等諸菩薩法。

(B) 釋疑：何以但說行般若故能至薩婆若

問曰：若行諸善法亦能至薩婆若，何以但說「般若故得至」？

答曰：

a、般若之功力最大故

雖諸善法和合能破煩惱、得阿耨多羅三藐三菩提，而般若波羅蜜於中功力最大。

譬如大軍摧敵，而主將得功名。

b、般若獨能至薩婆若，而餘法不得

復有人言：諸善法不得般若，不得至薩婆若；般若不得諸善法，獨能至薩婆若。

如《經》說：(637b)「師子雷音佛國，寶樹莊嚴，其樹常出無量法音——所謂一切法畢竟空、無生無滅等。其土人民生便聞此法音故，不起惡心，得無生法忍。」¹²⁰如此人何有布施、持戒等諸功德？

亦有狂人¹²¹、醉人從佛聞四諦，即時得道。

如是等無有智慧，行餘法得道，無有是事¹²²！

B、不憶念一切法故，般若於諸法不取不捨

(A) 諸法皆不可取捨故般若無取捨

a、正明

須菩提問佛：「般若畢竟空，不取聖法、不捨凡夫法，云何佛言『是般若波羅蜜¹²³能至薩婆若住』？」

佛可其言：「如是！如是！是般若波羅蜜無取無捨。」

b、釋因

雖言「取薩婆若」，以不取法故取。住義亦如是。

此中佛自說因緣，所謂「一切法不取相」。

「一切法」者，色乃至菩提。

(B) 不憶念取相故，不取色乃至無上菩提

是法虛誑，從因緣生，自性無故不取，不取故不捨，以不憶念取相故。

(2) 辨「不念不著義」

A、正明

(A) 須菩提問

須菩提言：「若不憶念色等法，云何增長善根？善根不增長，云何得阿耨多羅三藐三菩提？」

¹¹⁹ (大) + 悲【石】。(大正 25, 637d, n.7)

¹²⁰ 師子雷音佛國樹說無生，聞者得道。(印順法師，《大智度論筆記》〔H022〕p.416)

¹²¹ 參見《雜阿含經》卷 44 (1178 經) (大正 2, 317b22-318b11)。

¹²² 事 = 處【宋】【元】【明】【宮】。(大正 25, 637d, n.8)

¹²³ 〔波羅蜜〕 - 【宋】【元】【明】【宮】【聖】。(大正 25, 637d, n.9)

(B) 佛答

佛答：若菩薩能滅一切法中憶念，即是空、無相、無作解脫門；解脫即是諸法實相。

雖有善根，以取相著¹²⁴心顛倒故不增長；譬如種穀，其苗雖好，穢草多故，不能增長。

B、釋因

此中說因緣：「以眾生憶念故，生三界善、不善處；若無憶念則不著，不著則不生¹²⁵。」

(3) 辨「不著不住義」**A、正明**

須菩提從佛聞是已，思惟籌量：「是法畢竟空、無所有；若行是法，亦應無所得、無住處。何以故？因果相似故。」是故問佛：「菩薩作是念¹²⁶行般若，何所住、何所得？」

佛答：「色等一切法中不住，乃至不住中亦不住。」

B、釋因

不取相故不著，不著故¹²⁷則不住。

此中佛自說因緣：「是菩薩不見法有可著、可住、著者、住者。」

此中法難破故，但說「法」，不說「著者」。¹²⁸ (637c)

(二) 明學般若有得有失**I、明失****(1) 著人法空失**

「須菩提！若菩薩住是眾生空、法空，作是念『我能如是行』者，則是失、則是離。何以故？般若波羅蜜是不著相。」

是菩薩以我心外著空、內著我，不如般若行，故言「遠離般若」。何以故？般若波羅蜜是不著相，以性無故。

(2) 著般若無性失

上以著空故失，今以破空得般若而著般若無性故失，失故不得受記。

(3) 著菩薩道失**A、若念「住般若能生檀波羅蜜乃至大悲」，亦有過失**

若作是念「住般若中能生檀波羅蜜等」者，亦復是失。

¹²⁴ 著=若【宋】【元】【明】。(大正 25, 637d, n.10)

¹²⁵ 〔著不……生〕六字—【聖】。(大正 25, 637d, n.11)

¹²⁶ 〔念〕—【宋】【宮】。(大正 25, 637d, n.12)

¹²⁷ 著故=故著【聖】。(大正 25, 637d, n.13)

¹²⁸ 案：這是說明經文但言「是菩薩不見有法可著、可住」。

B、心有所求故失

問曰：上二失因緣可爾，今以何為失？

答曰：上二失以著空、著無性法故，便¹²⁹不能修檀波羅蜜等功德，而生邪見故，作是念：「若法都空，復何所行？」

是人以不著空、不著無性故行檀波羅蜜等，作是念：「能不著空、無性而能行是功德，是為真道。」是亦為失，以其心有惓望故。

C、若失般若，則不能行檀波羅蜜乃至大悲等諸德

若失般若，則不能行檀波羅蜜乃至大悲。

何以故？阿耨多羅三藐三菩提是真實法，般若波羅蜜與此相似；檀等諸善法不相似，以其取相著故。

(4) 著佛道起佛見失

若菩薩自憶想分別：「一切法不取相，諸佛知是已，得阿耨多羅三藐三菩提。」

「不取相¹³⁰」者，名「畢竟空」，不可取，諸相¹³¹滅故。

亦為他開示、演說，則失般若。

是人以求空則失、無性亦失；「我是凡夫生死人，諸煩惱未盡，云何能得？」但隨佛語¹³²，自不分別，而定心為他人說¹³³：「不取一切相是佛法。」種種因緣，以此事開示、教詔¹³⁴，是亦為失。

何以故？諸佛於諸法無所得，取義亦如是；是不取相法，乃至假名字不可說，何況有所得！諸¹³⁵佛¹³⁶法寂滅相，無諸戲論，一切語言道斷故。

2、明得

(1) 念諸法無所有、無可取、無所得，是行般若

A、須菩提問

須菩提作是念：「若空有（638a）失，空空中亦有失，無取法中亦有失，然不可無道。」今當問佛：「云何行者無是¹³⁷過失？」

B、佛答

(A) 略述

佛答：「若菩薩知諸法畢竟空、無所有、不可取，是法不可得知，如是行者則無失。」

¹²⁹ 便=更【宋】【元】【明】【宮】。（大正 25，637d，n.14）

¹³⁰ 〔相〕—【宮】。（大正 25，637d，n.15）

¹³¹ 相=根【宮】。（大正 25，637d，n.16）

¹³² 語=諸【聖】。（大正 25，637d，n.17）

¹³³ 人說=說人【宮】。（大正 25，637d，n.18）

¹³⁴ 教詔=演說【石】。（大正 25，637d，n.19）

¹³⁵ 諸=戲論【宮】。（大正 25，637d，n.20）

¹³⁶ 〔佛〕—【宋】【元】【明】【石】。（大正 25，637d，n.21）

¹³⁷ 是=有【聖】。（大正 25，638d，n.1）

(B) 詳說**a、出有失之行**

菩薩著¹³⁸畢竟空、著無性、著菩薩所行道，佛說三種皆失。

菩薩聞是已，則捨著心，今猶著佛所行未息：「如¹³⁹佛所行，必¹⁴⁰是真道，我但當隨佛行。」

一切法無所有、不取相，是故為失。

b、顯無過之行

今能如佛心中所得法——如是法相，佛亦無所得；無所得¹⁴¹故不貪貴佛、不輕賤餘人，於一切眾生其心平等¹⁴²。

(2) 於一切法離自相不著，則般若等生**A、須菩提問：若諸法離自相，云何行般若等**

此中¹⁴³更問：「如是，是¹⁴⁴清淨般若，無有過失，離自相不著¹⁴⁵。不離自相是即有相¹⁴⁶著法；若離自相，云何可行？」

B、佛答：於一切法不生，則般若等生

佛答：「若菩薩於一切法不生，是名能行般若。是菩薩不說『是色若常、若無常等，是色、誰色』。」

「是色」，破¹⁴⁷色；「誰色」，破人。

色乃至一切種智，亦如是。

若法如是畢竟空，推求不可得，是不可生。所以者何？性不能生性，無性不能生無性。

三、舉喻結歎般若最勝**(一) 四兵隨從聖王喻**

如是等破顛倒，得實論議，皆是般若波羅蜜力，餘波羅蜜皆隨從；譬如轉輪聖王有所至處，四種兵常隨從。

聖王福故，四種兵皆能飛；般若力故，諸餘法皆是實性，同至¹⁴⁸佛道。

(二) 善御駕駟喻

復次，譬如善御駕駟，不失平道。馬雖有致車之力，若無¹⁴⁹御者，則不能有所至；

¹³⁸ 著=者【宮】。(大正 25, 638d, n.2)

¹³⁹ 息如=自如【聖】，=息而【石】。(大正 25, 638d, n.3)

¹⁴⁰ 必=畢竟【石】。(大正 25, 638d, n.4)

¹⁴¹ 〔無所得〕-【宮】。(大正 25, 638d, n.5)

¹⁴² 等+ (釋曰)【石】。(大正 25, 638d, n.6)

¹⁴³ 〔中〕-【宋】【元】【明】【宮】。(大正 25, 638d, n.7)

¹⁴⁴ 〔是〕-【聖】【石】。(大正 25, 638d, n.8)

¹⁴⁵ 著=若【宮】。(大正 25, 638d, n.9)

¹⁴⁶ 〔相〕-【宋】【元】【明】【宮】【聖】【石】。(大正 25, 638d, n.10)

¹⁴⁷ 破=故【聖】，=誰【宮】。(大正 25, 638d, n.11)

¹⁴⁸ 至=是【宮】。(大正 25, 638d, n.12)

布施等亦¹⁵⁰如是，雖有功德果報力，無般若調御，不能至佛道。

（三）結義

如是種種譬喻，五波羅蜜入般若中雖無差別，以是事故而般若波羅蜜最尊、最妙。

（貳）為度眾生行方便，當學般若

一、明般若為大事故起——示是道、是非道

（一）明菩薩道與非菩薩道

須菩提聞佛種種因緣說般若最大，又聞不行是行（638b）般若波羅蜜，是故問佛：「世尊！何等是菩薩道？何等非菩薩道？」

佛答：「二乘非菩薩道。」

雖有凡夫及諸煩惱非菩薩道，鹿故不說；二乘同行空、同求涅槃故，說非菩薩道。鹿事人不疑，細事人疑故。

「薩婆若是菩薩道」——因中說果故。

（二）歎般若是菩薩導，為大事故起，令離二乘住薩婆若

須菩提歡喜讚歎般若，作是言：「世尊！般若波羅蜜為大事故起。」¹⁵¹如《經》中廣說，乃至「諸法常住故」。¹⁵²

（三）般若雖無生無滅，而不妨行六度

1、須菩提問

須菩提難：「若般若無所生無所滅，云何行布施、持戒等？」

2、佛答

佛答：

（1）論主釋：無生滅即畢竟空，不妨行六度

以般若無所生無所滅，即是畢竟空；畢竟空故，不妨行六波羅蜜。

¹⁴⁹ [無] — 【聖】。(大正 25, 638d, n.13)

¹⁵⁰ [亦] — 【宋】【元】【明】【宮】。(大正 25, 638d, n.14)

¹⁵¹ (1) 《摩訶般若波羅蜜經》卷 14〈49 問相品〉：

須菩提白佛言：「世尊！是般若波羅蜜為大事故起。……。」

佛言：「如是，如是！須菩提！般若波羅蜜為大事故起。……須菩提！云何是般若波羅蜜為大事故起？須菩提！諸佛大事者，所謂救一切眾生，不捨一切眾生。」(大正 8, 327a4-14)

(2) 《大智度論》卷 70〈49 問相品〉：「大事者，破一切眾生大苦惱，能與佛無上大法，故名為大事。」(大正 25, 551c26-552a1)

¹⁵² (1) 參見《摩訶般若波羅蜜經》卷 21〈69 方便品〉：

須菩提言：「世尊！諸菩薩摩訶薩般若波羅蜜為大事故興，所謂示是道、是非道！」

佛言：「如是，如是！須菩提！般若波羅蜜為大事故興，所謂示是道、是非道。須菩提！是般若波羅蜜為度無量眾生故興，為利益阿僧祇眾生故興。般若波羅蜜雖作是利益，亦不受色，亦不受受想行識，亦不受聲聞、辟支佛地。須菩提！般若波羅蜜是諸菩薩摩訶薩導，示阿耨多羅三藐三菩提，能令遠離聲聞、辟支佛地，住薩婆若。般若波羅蜜無所生、無所滅，諸法常住故。」(大正 8, 370c15-26)

(2) 另參見《大智度論》卷 82〈69 大方便品〉(大正 25, 634b18-28)。

(2) 引經說：念薩婆若，為度眾生行六度，迴向佛菩提

菩薩聞種種因緣讚一切智；為一切智故，行布施等法；是法為度一切眾生故，迴向阿耨多羅三藐三菩提；是六波羅蜜功德安立諸法實相中，迴向阿耨多羅三藐三菩提。

如是菩薩具足六波羅蜜、慈等諸功德，不顛倒，正行善根故。

二、觀法無合散，依無所住行六度**(一) 須菩提問**

須菩提問：「菩薩云何應習六波羅蜜？」

(二) 佛答

佛答：

1、觀諸法不合不散

「若菩薩觀色等諸法不合不散。」

色等諸法顛倒煩惱和合故合，以正智慧觀故散。

菩薩以利智慧深觀，則無法合；顛倒煩惱皆虛誑，故非合。如先破染、染者事中說。¹⁵³是故菩薩知諸法本不合故亦無散，則不生高心。

2、觀諸法無所住

復次，菩薩不應作是念：「我以真智慧令色等諸法清淨而住其中。何以故？色等法無住處。」

如地住於水，水住於風，風住於空，空無所住；以本無住處故，一切都無住。¹⁵⁴

「菩薩應如是住無住法中，得阿耨多羅三藐三菩提。」

三、欲上求下化，應習學六度**(一) 如土夫種樹，欲得無上菩提果，應行六度化眾生**

此中說譬喻：「樹」¹⁵⁵是般若波羅蜜，「菓」¹⁵⁶是阿耨多羅三藐三菩提。若人欲得阿耨多羅三藐三菩提，(638c) 應當種般若波羅蜜子。

「人」是行者，「水」是五波羅蜜。如人溉灌樹時，雖未見果實，時至¹⁵⁷則得時節和合，是具足諸法。

(二) 欲得諸功德，當學般若**1、欲不隨他語，2、欲嚴土熟生**

如《經》中說讚歎般若：「若菩薩欲不隨他行，得諸法實相；若有邪見人來破壞，覺而不隨；若欲淨佛國土、坐道場、轉法輪——當學般若。」

¹⁵³ 「如先破染、染者事中說」，待考。

¹⁵⁴ 參見《大方等大集經》卷 16〈8 虛空藏菩薩品〉(大正 13, 112c10-113a1)，另見《維摩詰所說經》卷中〈5 文殊師利問疾品〉(大正 14, 547c16-22)。

¹⁵⁵ 樹=子【元】【明】【石】。(大正 25, 638d, n.17)

¹⁵⁶ 菓=樹【石】。(大正 25, 638d, n.18)

¹⁵⁷ 時至=至時【石】。(大正 25, 638d, n.19)

3、欲於法自在

須菩提問佛：「如佛所教，菩薩當學般若？」

佛言：「我教令學般若。」

須菩提作是念：「一切法平等相，何以故但教學般若？」

佛答：「學是般若波羅蜜，於一切法得自在故，我教學般若波羅蜜。」

4、欲得三乘道當學般若——般若於一切法中最大故

般若波羅蜜於一切法中最大，如佛於一切眾生中最尊；又如萬川，大海為大。

5、欲勝諸魔怨

如《經》中說射師喻。若菩薩能如是一切法中行自在般若，魔、若魔人所不能勝，何況增上慢及邪見人¹⁵⁸！

6、十方諸佛護念

(1) 略述

是菩薩為十方諸佛所念。

諸佛念義，如先說。¹⁵⁹

(2) 釋因

A、菩薩雖行六度，亦觀畢竟空不可得

此中佛說：「若菩薩行六波羅蜜，亦能觀六波羅蜜畢竟空——如是人有大功夫故，為諸佛所念。」

譬如勇士入陣，破賊而不被瘡¹⁶⁰，則為主所念；菩薩亦如是，破諸煩惱賊，具足六波羅蜜，而不著六波羅蜜，則為諸佛所念。

B、諸佛不取相而護念

諸佛不取是菩薩色故念，不取受、想、行、識故念。

何¹⁶¹以故？色等諸法虛誑不實故、諸佛觀是菩薩身如實相故念。

(參) 得此方便，則於一切法皆明了

一、菩薩雖多有所學，而實無所學

須菩提歡喜言：「菩薩多有所學。」

亦學俗法、亦學道法，亦學諸波羅蜜、亦¹⁶²學畢竟空，亦學起、亦學滅。

凡夫¹⁶³學起不能學滅；聲聞學滅不能學起；菩薩亦學起亦學滅，是故言「多有所學」。是起滅如幻、如夢，畢竟空故，實無所學¹⁶⁴。

佛可其言，自說因緣：「菩（639a）薩所學，皆無所得。」

¹⁵⁸ 人=又【聖】。(大正 25, 638d, n.20)

¹⁵⁹ 《正觀》(6), p.200:《大智度論》卷 37 (大正 25, 332c29-333a12),《大智度論》卷 30 (大正 25, 282c-283c),《大智度論》卷 78 (大正 25, 613b15-16)。

¹⁶⁰ 瘡=鎗【宋】【元】【明】，=創【宮】【聖】【石】。(大正 25, 638d, n.21)

¹⁶¹ [何]—【聖】。(大正 25, 638d, n.22)

¹⁶² 亦=多【聖】。(大正 25, 638d, n.23)

¹⁶³ 夫=人【宋】【元】【明】【宮】。(大正 25, 638d, n.24)

¹⁶⁴ 學=得【石】。(大正 25, 638d, n.25)

二、菩薩學略攝般若，則知諸法略廣相**(一) 勸學六度若略、若廣，則能知一切法略廣相****1、釋經意——菩薩學諸法略廣相義**

須菩提白佛言：「世尊！佛所說法，若略、若廣，菩薩所應學，何以故言『所學皆無所得』？」

須菩提意：如佛所說八萬四千法聚、十二部經，若廣、若略，諸三¹⁶⁵乘人所學；此中說：菩薩欲得阿耨多羅三藐三菩提，應學六波羅蜜若略、若廣；學者應當受持、親近是法，讀、誦、思惟、正觀；乃至入無相三昧，心、心數法不行。菩薩能如是學，則能知諸法略、廣相。

2、釋「略、廣」義**(1) 第一說**

「廣」者，從八萬四千法聚¹⁶⁶已來無量佛法。

「略」者，乃至小品，小品中一品，一品中一段。

(2) 第二說

復次，「略」者，知¹⁶⁷諸法一切空、無相、無作、無生無滅等。

「廣」者，諸法種種別相分別，如後「善知識¹⁶⁸」中說。¹⁶⁹

(二) 以四門辨，知一切法略廣之相**1、須菩提問**

須菩提問：「云何菩薩知一切法略、廣相？」

2、佛答**(1) 約如明****A、無生滅住異相是諸法如相**

佛答：「若知諸法如如相者，所謂不生、不滅、不住異。」

B、釋疑**(A) 若「如」是一相、無生相，云何知「如」便能知諸法略廣相**

問曰：若「如」一相、無生相，云何菩薩知是「如」故知諸法總相、別相？總相、別相，即是略、廣相。

答曰：「如」名諸法實相，常住不壞，不隨諸觀。菩薩得是「如」，即破無明邪見等諸顛倒；是人得實法故¹⁷⁰，一切世間法——總相、別相，了了知。先¹⁷¹凡夫時智慧眼病，以無明顛倒覆故，不能實知。

¹⁶⁵ 三=二【石】。(大正 25, 639d, n.1)

¹⁶⁶ 聚=眾【聖】【石】。(大正 25, 639d, n.2)

¹⁶⁷ 知=智【聖】。(大正 25, 639d, n.3)

¹⁶⁸ 〔識〕—【宋】【宮】【聖】。(大正 25, 639d, n.4),

¹⁶⁹ 《正觀》(6), p.200:《摩訶般若波羅蜜經》卷 24〈79 善達品〉(大正 8, 398a-400c);《放光般若經》卷 18〈79 超越法相品〉(大正 8, 128b-130b)。

另參見《大智度論》卷 89〈79 善達品〉(大正 25, 688a-692c)。

¹⁷⁰ 〔故〕—【宮】。(大正 25, 639d, n.5)

¹⁷¹ 知先=先知【宋】【元】【明】【宮】。(大正 25, 639d, n.6)

（B）實法相是空、無相，云何言「得如實相故能了了知諸法總相、別相」

問曰：「實法相」者，所謂空、無相、無作，諸智滅；云何言「得如實相故，了了知諸法總相、別相」？

答曰：我已先¹⁷²答，而汝於「如」中取相故，復作是難；汝若知¹⁷³「如」，不應作是難。是「如」畢竟無相故，不妨¹⁷⁴知諸法總相、別相，以智慧明¹⁷⁵了了故。

復次，譬如人年既長大，乃知小時所行皆愚癡可笑。

菩薩亦如是，入諸法實相¹⁷⁶，起已，還在顛倒果報六情中，念寂滅解脫樂，乃知世間六情所著皆是虛誑可捨法——是名「總相」。

於此中分別（639b）不淨有上、中、下，無常、苦、空、無我等亦如是，乃至八萬四千種諸錯謬。

（2）約實際（無際）明

復次，知如、法性、實際故，亦知諸法略、廣相。

如、法性、實際差別義，如初品中說。¹⁷⁷

此中，佛說：「非際是實際。」

「非際」者，無相可取，無定法可著。

（3）約法性明

得法性故，知色等十八性皆是法性。

「法性相」者，佛說：「無分、無非分。」

「無分」者，不可示此示彼，無分別、無相、無量。

「無非分」者，不著是無相、無量等破量相。

「法性」，二事妨¹⁷⁸故不見：一、有相、有量，二、無相、無量。有相、有量為麤，無相、無量為細，是故說「法性相無分、無非分」。

菩薩入三解脫門，住如等三實法，則能籌量知一切法¹⁷⁹總相、別相。

（4）約不合不散明

A、正說

須菩提聞佛答已，欲更問無量佛法異門事。

佛答：「知一切法無合無散故，則知諸法總相、別相。」

¹⁷² 先=失【聖】。（大正 25，639d，n.7）

¹⁷³ 〔知〕—【聖】。（大正 25，639d，n.8）

¹⁷⁴ 妨=防【石】。（大正 25，639d，n.9）

¹⁷⁵ 明=眼【宋】【元】【明】【宮】【聖】。（大正 25，639d，n.10）

¹⁷⁶ 相+（相）【聖】。（大正 25，639d，n.11）

¹⁷⁷ 《正觀》（6），pp.200-201：《大智度論》卷 32（大正 25，297c1-29）。

¹⁷⁸ 妨=防【石】。（大正 25，639d，n.9-1）

¹⁷⁹ 〔法〕—【聖】。（大正 25，639d，n.14）

B、諸法皆無自性，無所有，云何有合散

問曰：眼見二指有合散，云何言「無合散」？

答曰：

(A) 肉眼所見不可信

我先言：「肉眼所見，與牛羊無異，不可信。」¹⁸⁰

(B) 指無定法

復次，三節¹⁸¹皮肉具足為指，指無定法。

(C) 設有指法，亦不盡合

復次，設有指法，亦不盡合——一分合，多分不合；多分不合故，不得言「指合」。

※ 釋疑：指有少分合，應名為「合」

問曰：以少合故名為合。

答曰：指少分不名為指，云何言「指合」？若多¹⁸²分不合不名為不¹⁸³合，何以少分合故名為合？是故不得言「二指合」。

(D) 指與分不一不異，故無合

復次，指與分不一不異，即是無指；無指故無合；入破一異門中，則都無合。

(E) 一切法無自性，法無自性故無合散

如佛此中說：「一切法自性無，性無故即是無法¹⁸⁴，無法云何有合散？」

(三) 勸學略攝般若

須菩提聞佛說如、法性、實際、不合不散四門，知略、廣相，是故須菩提言：「世尊！是名『略攝般若波羅蜜』。略攝聞¹⁸⁵是安隱道故，一切菩薩所應學。」

¹⁸⁰ 《正觀》(6)，p.201：《大智度論》卷 38 (大正 25，338a12-b16)。

¹⁸¹ 節=櫛【石】。(大正 25，639d，n.15)

¹⁸² 多=是【宮】。(大正 25，639d，n.16)

¹⁸³ 〔不〕-【元】【明】【石】。(大正 25，639d，n.17)

¹⁸⁴ 法=性【聖】。(大正 25，639d，n.18)

¹⁸⁵ 聞=門【宋】【元】【明】【石】。(大正 25，639d，n.19)